

海南先贤诗文从刊
海南地方文献丛书编纂委员会汇纂

琼台耆旧诗集

下册

王因宪编

海南出版社




海南先贤诗文丛刊
海南地方文献丛书编纂委员会汇纂

主 编 洪寿祥
执行主编 周伟民

琼台耆旧诗集

下册

王国宪 编订
饶宝华 校刻
郑行顺 点校



海南出版社

海南出版社
PDG

图书在版编目(CIP)数据

琼台耆旧诗集/王国宪编;饶宝华校刻;郑行顺点校.
-海口:海南出版社,2004.10
(海南先贤诗文丛刊/洪寿祥,周伟民主编)
ISBN 7-5443-0976-2

I. 琼... II. ①王... ②饶... ③郑... III. ①古典
诗歌—作品集—中国—清代 IV. I222.749

中国版本图书馆 CIP 数据核字(2004)第 050084 号

琼台耆旧诗集

郑行顺 点校

责任编辑:袁大川

*

海南出版社出版发行

(570216 海口市金盘开发区建设三横路 2 号)

全国新华书店经销

湖南新华印刷集团有限责任公司(南)印刷

2004 年 10 月第 1 版 2004 年 10 月第 1 次印刷

开本:880×1230 毫米 1/32 印张:28.75

字数:508 千

ISBN7-5443-0976-2/I·46

定价:80.80 元

海南地方文献丛书编纂委员会

顾	问	陈玉益	蔡长松	周文彰	王学萍
主	编	洪寿祥			
执 行 主 编		周伟民			
常务副主编		郑行顺	袁大川		
副 主 编		徐 庄	潘在积		
编 委		王经华	李昭淳	刘剑三	
		余 虹	张三夕	张春明	
		侯月祥	倪俊明	唐玲玲	
编 务		杨德禧			



卷十七 王沂暄

拟白香山贺雨谨次原韵

皇天久不雨，旱自旧年冬。今已春三月，蕴隆犹燠燠。百谷俱未稼，何以御灾凶。黔首多流离，携族适他邦。他邦不我畜，共叹谁与宗。圣躬深自责，忧心更忡忡。筹何绥华夏，虑何靖巴邛。日下赈饥诏，南北及西东。省刑宽宥赦，农息趋公功。百废或不修，负咎在藐躬。深维图天眷，急思致时雍。清心以寡欲，震动与恪恭。君心无宴乐，天亦闵困穷。虔祈方七日，雨将惠三农。乍闻垤鸣鸛，忽见云从龙。淋漓沛然下，遐迩慰心衷。披蓑歌牧童，把酒赏村翁。妇子走相告，喜色满襟胸。踏云携锄去，耕野叱犊从。泥痕沾滑滑，水乳如交融。泉流穿涧落，送响来清风。满沟兼满浚，皆得雨蒙蒙。稻孙生翼翼，黍苗歌芄芃。睹兹田畴景，鱼梦占多丰。奚幸得此惠，万井沾濡同。方知苍天心，有诚无不通。共祝依旬降，我私及我公。民物兆丰亨，人在太和中。为纪元和事，宸衷廑深宫。香山诗奉贺，献言达主聪。披吟思妙句，恳恳见精忠。高歌今载续，敢和曲

三终。

知稼轩述怀

少励茂先志，思愈柴也愚。趋庭闻诗礼，求道分墨
儒。世常食旧德，家让移新居。先祖扬斋公，因城内兄弟多，卜新
居移此。开轩名知稼，吾父垂良图。义取无逸句，艰难知
勤劬。八景诗唱和，大雅轮能扶。时人多不识，谓吾计迂
疏。读书贵致用，皇路当驰驱。秀才范文正，贤良董仲
舒。上足致君国，勤襄文教敷。下亦为循良，严将蠹弊
除。文章本经济，训辞原典谟。效收实业益，声戒纯盗
虚。胡为隐泉石，卜宅城南隅。烟霞积成癖，诗酒欢自
娱。解嘲嗜雄文，乞米临颜书。于世毫无补，迹欲混樵
渔。或借为捷径，莫谓人厚诬。吾闻时人语，人实不知
吾。穷达自有命，出处原分途。樊迟请学稼，儿宽带经
锄。书田岁罔歉，笔耕仓多储。吾学古人学，成迹毋过
拘。庞公无城府，仲淹有田庐。志莫食求饱，兴岂败催
租。森森宝万卷，孜孜爱三余。守吾传经训，味吾至道
腴。下第何愧刘，救荒聊效朱。天伦叙乐事，高堂皆庆
俱。家亦可为政，孝乎惟友于。奚必求利禄，奔走工佞
谀。平时志何事，倏尔终始渝。未立千秋业，徒负七尺
躯。敬告谢时人，应谅心区区。

拟东坡买地筑室

世路多轂击，日日相踏践。崎岖不及防，跌蹶诚不免。顾我迁谪来，偶寄随显宦。何期被驱逐，反貽使君患。购地城南隅，卜筑茅茨翦。数椽蔽风雨，俯仰得所愿。子云居东邻，去此亦非远。有时载酒至，举樽相劝勉。栖息聊自安，寄兴复不浅。

拟东坡与张中军使同访黎子云，坐客釀

钱作屋，名曰载酒堂

城东两黎子，乐道而安贫。薯芋食亦饱，耕读力尤勤。临池数亩地，清幽无俗尘。军使同来访，坐客皆釀钱。为谋更作屋，光景留常新。肇赐以嘉名，私愿咸欣然。细详名中意，厥味常津津。真一时对酌，自觉醇乎醇。醉乡浑无事，悠然葛天民。

阿芙蓉

印度生毒物，鸦片名久传。又号阿芙蓉，航海来中原。谓为妙药品，服食增精神。流毒遍海内，贼此蚩蚩民。非花亦非酒，迷人实醉人。每于床第间，相伴灯火亲。连宵频嘘吸，终日如沉沦。死生在醉梦，吐纳多云烟。佳景足移情，爱恋官与绅。高斋祕阁中，翠幕火生

莲。情深贪玩味，嗜欲潜相牵。肺腑久薰灼，面目失本真。犹谓补筋骨，齿颊皆流芬。寒变孟郊体，瘦耸贾岛肩。不久成废疾，国手难回春。大丧名与节，小耗庐兼田。况干当时禁，又被官长瞋。端人恒不齿，室人亦反唇。丈夫贵自立，休受此苦辛。却步出岐路，回头转迷津。勿视如性命，毋习俗相沿。永绝非非想，保兹有用身。补牢未犹晚，舍旧而谋新。

游法源寺观碑

法源古名刹，我闻自前时。今晨寺门入，石磴高低随。山僧出肃容，相见方外仪。瀹茗询自来，姓名始相知。邀我游禅房，花木多香姿。高槐落翠叶，古梅开铁枝。徐步过庭院，摩挲观唐碑。遗刻李北海，断碣苏灵芝。劲秀存古法，铁画无偏欹。流传千余载，保存勤护持。嗜古有同癖，难得今禅师。载观重刻石，赝贗负若驰。翠珉质坚栗，碑额蟠蛟螭。覃溪善临摹，补勒存古遗。考核究原委，将军纪云麾。当时定朔方，战士收熊罴。载笔书勋伐，濡染何淋漓。遂使古人绩，一一来世垂。今我审遗石，书法参正奇。李劲而瘦峭，苏圆而丰肌。譬如褚与虞，两美皆得宜。可称为后劲，曹随见萧规。窃欢古人书，几经学临池。方能成一家，心慕而手追。师法有由自，唐人得晋诒。遍览真眼福，旷代寄遐

思。谁为参祕钥，波磔转折窥。亲为搦数纸，助我多师资。持归出梵院，不觉日西移。驱车逐缁尘，远视频褰帷。鳞鳞声忽止，入室亦忘疲。示我同志者，请视纪游诗。

见 雪

海南天无雪，未见花六开。远游滞京国，连夜北风催。起视绮窗外，树树垂寒梅。忽惊冻萼破，未闻暗香来。始悟天公戏，大地散琼瑰。九重峙宫阙，倏成白玉台。万里看河山，尽是白雪堆。纷纷眩银海，何处分埏垓。乾坤成不夜，天地无纤埃。太空本太素，至理造化该。路赏见高致，郊寒真异才。乘兴聊适意，禁体仍自裁。诗成耸吟肩，对景忘徘徊。南中携雪归，出示吾朋侪。开卷灿瑶华，相赏清兴佳。

学 琴

天地有正声，悠然始何属。古人知微妙，诗歌谱入曲。至理深造化，性情归陶淑。操缦学有年，予学琴二十年，尚未能精，未得从心欲。素志在山水，寄怀惟丝竹。凉月空满庭，松风响在谷。对景移我情，所思人如玉。成连不可作，绝调孰能续。操引寻本源，指法求纯熟。神若游太虚，气常存浑穆。临风试一奏，古音尚可复。广陵散犹

在,千载慕芳躅。莫叹知音稀,雅弄不随俗。

秋日游南园有怀前后十先生

昔读先生诗,风雅皆我师。今来游南园,胜地千古存。当年结诗社,即今抗风轩。百越风骚启文献,历代流传古风远。冠冕南极声誉隆,大雅扶轮先后见。西庵才调冠当时,赵黄王李并辔驰。提倡粤雅归正始,岭表才名海内知。仑山复古相继起,重开诗社南园里。一时旗鼓正相当,瑶石兰汀与吴李。追逐李杜参庾徐,名士传来原不虚。漫将十子夸大历,还如四杰开唐初。风流遗韵道未坠,云淙师弟敦古谊。影园报道状元归,花信赓歌传韵事。一自烽烟卷地来,歌台吟席生尘埃。先后殉难何节烈,海棠花泪杜鹃哀。堂堂正气照天地,能以文章兼节义。百年大雅著作存,千秋遗迹名胜记。我来访古秋日明,荷池零落潭水清。昔日古人吟诗处,今日诗写古人情。太息沧桑经几度,祠宇重新地犹故。瓣香敬祝十先生,亮节高风深倾慕。

浮粟泉歌

名泉胜景四时续,雅爱坡公遗芳躅。凿开泉脉甘可服,洞酌名亭著琼俗。雉堞排青溪流馥,古道清幽家家掬。泉禀庚辛气清淑,精融九穀钟灵毓。滚滚粒米金波

煜，粟浮千畦香生玉。金镜双开生面目，上下天光云影伏。涵碧落兮星湍湫，光流金兮双丸沐。喷细响兮声可数，挹注兹兮异奔瀑。调水分符试破竹，大瓢深汲躬且鞠。有澠有溜一瓶蓄，龙团初试香馥馥。美甘如醴胜醺醪，长流万古仰玉局。有时暮春童冠属，春服修楔水流曲。风平亭上泉边浴，清濯缨兮浊濯足。高荫长夏千章木，新荷田田新竹绿。薰风一曲泉鸣筑，披襟观稼消暑溽。秋来倒泻银河矗，月涌冰轮飘金粟。登高煮茗赏黄菊，槛俯平畴禾将熟。严冬风寒水清肃，木落泉流雪花沃。水不冰兮泉不涸，活泼源头深渟洿。由来妙趣旋环复，洞里乾坤八风穆。饮泉诘诗从所欲，斲石每怀谢翁陆。

桄榔庵 用东坡游金山寺韵

祠宇瞥见碧空起，丛云苍翠眩银海。云是东坡桄榔庵，宦迹千秋今尚在。东坡行脚如头陀，万里投荒凌风波。城南流寄偶卜宅，数椽足蔽风雨多。雨后山溪放舟楫，滚滚长流渡白日。岩间雨洗青山青，户外霞飞赤城赤。自笑宦途频落魄，摘叶书铭云烟黑。而今世事渐分明，历尽危险心不惊。寄傲南窗人不识，胸中空洞如无物。举头一望珠崖山，山灵笑我仍愚顽。星移物换时不已，长留此庵寄烟水。

笠屐图 翁覃溪摹刻罗雨峰画本

天涯贬谪远迁徙，春梦一场偶然耳。宰官虽现鹿角巾，浮云富贵如敝屣。茅屋寂寞一事无，策杖东行访黎子。此来正值晨鹳鸣，霾霏蜈跃云四起。霰霰已湿李下冠，霰霰更濡瓜田履。白头穿林苦低垂，赤脚沾泥防灭趾。装首饰足胡为哉，簪笠芒鞋斯可矣。团团头上风欲吹，得得山前雨未止。妇人儿童笑嘻嘻，篱犬群吠声不已。不愁故人惊倒绝，自笑今吾安鄙俚。君不见，玉堂金马李学士，两足如霜走金齿。又不见，蓑衣竹笠真元子，一竿西塞烟波里。前人风度已渺然，后人追摹敬瞻彼。况公文教开炎荒，遗像贞珉深仰企。惟此两峰工传神，琼台碑刻难若是。原搨获自藤县来，岭海增光此一纸。罗雨峰摹笠屐图神妙如生，翁覃溪刻于广西藤县，与琼台石刻不同，余家有之。敬展高悬知稼轩，想见眉山道貌在。丰姿奕奕如生前，时代虽易神不改。朗诵海南真乡诗，千秋魂魄应恋此。

连日亲朋来访，询及都中途中时事，诗以答之

远游冀北今始归，连日亲朋歌来思。枉顾敝庐光茅茨，为我洗尘衣涤缁。自叹万里走京师，无才莫遇非数奇。三年流寄身远羁，山川风景随处宜。古鼓获观周狩

岐,法源亲搨唐云麾。有时宫阙美富窺,金螯玉螭太液池。有时名胜频探奇,万柳堂名陶然亭名督沆陂。兴来不减游南皮,归来还读时下帷。文章憎命洵无疑,赏音未遇贤有司。翘首南望战云垂,纷纷羽檄千里驰。皖鄂湘赣屯虎貔,左冲右突江海湄。丈夫志在安边陲,安能久事笔砚为。从军欲建临淮旗时有友人邀从军,因病不果,忧时欲赋青坂诗。非图官拜杜拾遗,聊为从事韩退之。裴度征淮西时,退之为从事官。虚有其愿功莫施,束装惟带书剑随。归途一身经险巇,哀闻鸿雁心伤悲。浮湘度口皆忘疲,江山助我吟撚髭。兹游奇绝兼乱离,恨无李杜笔数枝。上陈罪言肝胆披,下哀满目多疮痍。监门图画民流移,舂陵行歌民苦饥。拯救深热须及时,庶几病国方能医。置身局外徒嗟咨,世路多阻还家迟。入门定省吾亲慈,过从朋友情依依。深为慰藉询其私,谈心语旧酒一卮。聊将时事写襟期,历历行踪皆在斯。宪按:篇中二押“奇”字,其解不同。“支”韵二收,非为重字,唐人古诗常有。

题冯君覲臣画山水,即以奉赠

虚堂四壁山飞峙,林壑丛云景尤美。流泉悬布挂碧峰,一泻潜通清江水。渔舟泛泛波浪间,帆随天风伏又起。是何妙手工写生,千里山水收笔底。摩诘画中自有诗,今君诗在画图里。我未能画知其意,欲为海外补画

史。君为醇士所拔取，早称入室高弟子。相赏原不隔神明，其亦许我卧游耳。

寄家信后情不能已，聊为书怀

勉强慰高堂，封缄字数行。望云家万里，对月客他乡。烽火连天远，山川别路长。料应书到日，思子定悲伤。

偶感风寒愈而有作

偶有寒风感，中怀郁莫舒。仲宣原体弱，谢述素心虚。亲在深宜讳，朋来数不疏。家撰臣弟数来问疾。读诗能愈疟，吾亦爱三余。

寒夜思家

寒柝忽惊起，还乡梦有无。云山千里隔，风雨一灯孤。浪迹仍燕市，思亲望海隅。那堪书定省，珍重寄长途。

游黄金台

昔日招贤馆，今时课士台。今金台书院即其地。何人能市骨，为国正需才。霸业千秋歇，人文一代培。来游聊负笈，怀古莫悲哀。

游国子监

天下人才聚，成均百代宗。制犹周太学，礼重汉临雍。移鼓从韩愈，周宣石鼓移置太学，议由昌黎，镌经变蔡邕。石经刻始蔡邕，其文隶体。今太学石经皆正字，已变汉法。获观真眼福，不负此游踪。

排闷四首

排闷强裁诗，杜句，观书欲倦时。无声春雨细，有味夜灯知。元晦肠空洗，时以雪水烹茶，边韶腹任嗤。偷闲聊自适，散步撚吟髭。

排闷强裁诗，忧时岂为私。和戎从汉策，时与英吉利议和，许五口通商，逆虏败王师，洪逆久据金陵。皖鄂干戈满，津沽羽檄驰。谈兵良不易，何日靖潢池。

排闷强裁诗，思家瘴海湄。望穿燕树远，心逐岭云驰。吴楚悲争战，乡关久别离。功名难预必，莫慰倚闾思。

排闷强裁诗，怀人系我思。天南阻良觐，辇下少新知。鱼素江湖邈，鸡鸣风雨悲。蓟门春树暮，怅望日斜时。

寄家秀升弟郑翊臣妹弟二首

忆自琼台别，于今阅岁年。一经精素业，万选擅青钱。遇合皆前定，翊臣去秋闻已拟中前列，因礼艺不满三百字，遂见揆。才名决后传。及时须努力，载籍勉钻研。

莫以远为念，都门聊寄身。访碑寻古寺，拂袖净缁尘。有癖书求旧琉璃厂旧书最多，且有宋明刻本，无心句得新。开函如覩面，自见性情真。

赴柏乡谒邱镜山外叔，留读署中赋呈四首

万里上京师，家山远别离。今来瞻道貌，已足慰怀思。甥馆浮踪寄，师门雅训垂。前十年从学。趋承亲杖履，恍似在庭帷。难得他乡聚，依然是内亲。昔年蒙教育，今日赖陶甄。谭艺新阐发示近时制义数种，传经古义伸。公余无废读，文雅自彬彬。

垂问家庭事，无忘父子情。高堂常健饭，诸弟亦知名。研北三千卷，图南九万程。望云亲舍远，一为叙生平。

柏乡理学邦，文毅流泽长。继起应多秀，怀才孰异常。及时宏教化，方驾古循良。惟愿施经济，遥传往代芳。

洞庭舟中即事二首

放棹渡潇湘，浮空天水长。风帆飞浪破，山影压波光。难续钱郎梦，时京兆下第归，如闻帝乐张。中流自容与，寄兴在苍茫。迎面似相识，君山数点青。孤舟浮日月，战舰走雷霆，时有水师船十余号飞渡南去。天末望亲舍，湘中见将星。曾涤生侍郎总督军务，起兵湘中。何处甲兵洗，过客快扬舲。

重度梅岭

昔年初度岭，尚欠咏梅诗。今日归途缓，寒花满树垂。香风飘磴道，瘦石挺疏枝。窃恐山灵笑，无才强索思。

观音岩二首

石壁峙凌空，擘开古梵宫。地疑飞鹫岭，天造辟鸿蒙。高落苍穹外，光摇碧浪中。停舟探胜景，俯瞰峡山通。

北江来滚滚，壁立起千寻。云气生仙掌，天风送梵音。神工开盘古，宝相留至今。欲证初禅地，嵌空剩碧岑。